

# Vun driveriver

---

erscheint auf [www.lenauheim.de](http://www.lenauheim.de)

monatliche  
Erscheinung

Oktober 2021

von *Helen Alba*

## **Dorfgschichte, die mer nit vergesse kann Braut un Breitigam aushewe**

Un wieder verzählt die Bäsl Mari: „Wie des war, als ich un mei Pheder gheirat han? Weil der Musikant war, hat uns selmols die Musich nix gekoscht. Des Hochzeitsesse war im Wertshaus, dernoh, morjets um fünf Uhr sin mir zwaa abghau, de Brauch war: Braut un Breitigam aushewe. Ich han e Schulkumradin ghat un mitm Herta han ich es so abgemacht: Anstatt hem schlofe zu gehn, hat es Herta vorgeschlaa: Kummt zu uns, dorte kennt der vore in der großi Stub schlofe. Un wie die Musikante de Marsch geblost ghat han, also wie die Hochzeit sozusaa rum war, han die Musikante sich uf de Wech gemacht, for uns halt aushewe. Sie han uns gsucht, bei mir un beim Pheder derhem... nix zu finne. Im ganze Dorf han se uns gsucht, doch die Idee, uns beim Herta zu suche, is ne lang nit kumm. Doch sie han die Sucherei nit ufgin.

Was des Aushewe eigentlich bedeite tut? Braut un Breitigam han ufstehn un weiter mit de Musikante mitgehn misse Ständchen singe oder nor so zum Vergniegen. Es hat zu Esse un zu Trinke for alli un iwerall gin. Un, oh weh – es hat nit gleich etwas ufm Tisch gstann! Die Musikante sin in de Keller um Wein, in die Speis, wu se Schunge un Worscht ghol han.

Doch irgendwann hat e Gschwisterkind vun mir gsaat, er hätt bemerkt, wie ich un es Herta rum gepischpert un derbei sicher was ausgeheckt han. Also is die Lakai zu guterletscht dorthin kumm, wu se uns gfunn han. Des war nohmittachs geger drei Uhr, mir han schon ausgeschloft ghat, han dorchs ganzi Dorf mitlaafe misse bis in die Neigass, beim Toni war dann Halt.

Bevor mer bei ihm nin ins Haus sin, han mer em Toni seiner Oma e Schreck injaan wille. Die Musikante han de Toni an Händ un Fieß angephackt un han ne so ins Haus getraa. Die aldi Oma hat bal de Schlach getroff, sie hat gement, ihre Toni wär stockbsoff, ihre Toni, der wu nie beim Trinke iwer de Strick gschlaa hat. Doch de Toni hat die Oma beruhicht, die Kumrade han nor ihre Schawernack getrieb. Die Oma hat Kipple gebackt ghat, die sin alli rumps un stumps ufgess gin. De Toni hat gheere Akkordeon gspillt un scheen derzu singe kenne. Er hat sei Akkordeon verwischt un mir han uns weiter unerhall..... Des sin so Dorfgschichte, die mer nie vergesse kann“!